

**TEZAUUR LITURGIC**  
**20 SEPTEMBRIE**

**ACATISTUL**  
**SF. MARE**  
**MUCENIC**  
**EUSTATIE**  
**DE LA ROMA**



**MOSCOVA, 2000**



# Акафист

## СВЯТОМУ ВЕЛИКОМУЧЕНИКУ

### Евстафию Плакиде

#### Кондак 1

---

Избранному воеводе, к лику святых сопричтенному, святому Евстафию Плакиде песни похвальные приносим ныне. Ты же, великомучениче, огнем мучений в покой небесный вшедый, от огня страстей и всяких нас бед свободи, со упованием тебе зовущих: Радуйся, великомучениче Евстафие, молитвенниче о душах наших.

#### Икос 1

---

Ангелов Владыка и человеков Творец хотяй всем спастися и в разум истины приити, в дивнем образе явися тебе, Евстафие, егда над главою еленя Крест и на нем подобие распятого за ны Господа Иисуса Христа узрел еси. Ты же глас Христов: «Почто гониши Мя, Плакидо?» во изумлении слышав, в страсе вопрошал еси: «Кто Ты, Господи, ко мне рекий?» И уведев, яко Той

есть Иисус Христос, пришедый грешныя спасти, истинным Богом Того исповедал еси. Мы же, таковому твоему обращению к вере истинней чудящися, взываем сице:

Радуйся, из среды нечестивых Господем изведенный.

Радуйся, на путь спасительный Им наставленный.

Радуйся, всем сердцем Творца возлюбивый.

Радуйся, огонь страстей в себе угасивый.

Радуйся, яко за имя Сладчайшаго Иисуса страдания велия претерпел еси.

Радуйся, яко верен Ему даже до смерти лютыя пребыл еси.

Радуйся, венцем мученическим главу свою украсивый.

Радуйся, райския сладости со святыми вкусивый.

Радуйся, великомучениче Евстафие, молитвенниче о душах наших.

## **Кондак 2**

---

Видя Господь сердца твоего чистоту и велие милосердие ко всем бедствующим и

страждущим, не остави тя во мраке идолослужения пребывати, обаче светом веры Христовы ты просвети, да, познав истинного Бога, со всеми праведными воспоеши Ему: Аллилуиа.

## Икос 2

---

Разум богопросвещен имея и гласом Божественным свыше наставленный, святе Евстафие, яко мудрая глава дому своему, ко спасительней вере и святому Крещению привел еси вся живущия в нем. Сего ради восхваляем тя, глаголюще:

Радуйся, истину Божественную возлюбивый.

Радуйся, милостыню Христа ради творивый.

Радуйся, образ жития праведнаго нам показуяй.

Радуйся, раны греховныя искусно врачуяй.

Радуйся, яко верных к прославлению Господа воздвизаеши.

Радуйся, яко любви к Богу и ближним нас научаеши.

Радуйся, сладкогласный Христов проповедниче.

Радуйся, Горняго Царствия со святыми наследниче.

Радуйся, великомучениче Евстафие, молитвенниче о душах наших.

### **Кондак 3**

---

Силою Божественныя любве укрепляеми, святии мученицы Евстафие и Феопистие, со смирением и терпением вся беды и напасти претерпели есте, упование свое на единого Господа возлагая, с верою поюще Ему: Аллилуиа.

### **Икос 3**

---

Имущи в сердце своем желание Единому Господу верно служить, дом твой оставил еси, Евстафие, и по морю во Египет со всем семейством устремился еси. Таковому смирению твоему и упованию на Промысл Божий дивящися, приносим ти похвалы сицевыя:

Радуйся, яко нас ради обнищавшему Господеви уподобился еси.

Радуйся, яко подражаяй Святому Семейству, во Египет бежал еси.

Радуйся, веру велию во Христа в сердце своем имевый.

Радуйся, вся скорби мужественно претерпевый.

Радуйся, сущим в нуждах и скорбех скорый помощниче.

Радуйся, душ наших добрый наставниче.

Радуйся, Крест Христов в сердце своем начертавый.

Радуйся, безропотным несением креста своего путь спасительный нам показавый.

Радуйся, великомучениче Евстафие, молитвенниче о душах наших.

#### **Кондак 4**

---

Бурю лютых гонений и бед воздвиже на тя враг рода человеческого, великомучениче Евстафие: ты же, яко Иов Многострадальный, вся лишения низпосылаемая тебе, безропотно приемля, укреплявшему тя Богу взывал еси: Аллилуиа.

#### **Икос 4**

---

Слыша Господь молитвы твоя к Нему возносимыя, помощь и утешение милостиво подаваше тебе, Евстафие; ты же, любовь к Богу и ближним распаляяся, скорбь о лишении

супружницы и чад своих со смирением и кротостию претерпевал еси, за вся Бога благодаряще. Мы же, таковому твоему терпению удивляясь, со умилением воспеваем ти:

Радуйся, веры непоколебимый столпе.

Радуйся, христиан несокрушимый щите.

Радуйся, неоскудеваемое чудес сокровище.

Радуйся, неисчерпаемый исцелений источниче.

Радуйся, яко верных во благочестии укрепляеши.

Радуйся, яко вся скорби со смирением претерпевати научаеши.

Радуйся, вместилищем дарований Божиих на земли бывый.

Радуйся, добродетельным житием Царствие Небесное стяжавый.

Радуйся, великомучениче Евстафие, молитвенниче о душах наших.

### **Кондак 5**

Боготечною звездою, приводящею к познанию жития смиренномудренного показался еси, великомучениче Евстафие: в

стране чуждей многия лета, доблестный воевода сый, в услужении господину своему во смирении пребывал еси, непрестанно поя: Аллилуиа.

### Икос 5

---

Видяще веру, терпение и благодарение твое за вся, досточудне Евстафие, умиляемся и, чтуще любовьию святую память твою, вопием ти сице:

Радуйся, земнаго отечествия мужественный защитниче.

Радуйся, небесных селений достойный наследниче.

Радуйся, яко Господа Помощником выну имел еси.

Радуйся, яко жития твоего за други своя не щадил еси.

Радуйся, пред Богом наш теплый ходатаю.

Радуйся, о душах наших скорый предстателю.

Радуйся, у Престола Божия о нас усердно моляйся.

Радуйся, о призывающих имя твое непрестанно пекийся.

Радуйся, великомучениче Евстафие,  
молитвенниче о душах наших.

### **Кондак 6**

---

Проповедник веры во Христа словом и делом  
явился еси, святой мучениче, добродетельным  
житием своим многия идолопоклонники светом  
истины Христовы просвещая и истинному Богу  
пети всех научая: Аллилуиа.

### **Икос 6**

---

Возсия свет радости велия, Господем  
милостивно тебе ниспосланная, Евстафие  
славне, егда по мнозех летех семейство твое  
паки вкупе соединиися. Воспевая дивное  
Промышление Божие, на тебе и сродницах твоих  
явленное, зовем ти:

Радуйся, благочестием твоим Христу  
угодивый.

Радуйся, велие дерзновение к Нему  
стяжавый.

Радуйся, сугубья благодати от Царя славы  
сподобивыйся.

Радуйся, венцем мученическим от него  
венчаный.

Радуйся, Святыя Церкви бисере драгий.

Радуйся, воине Христов непобедимый.

Радуйся, богатства мира сего ни во чтоже  
вменивый.

Радуйся, от Господа небесную славу  
улучивый.

Радуйся, великомучениче Евстафие,  
молитвенниче о душах наших.

### **Кондак 7**

---

Хотяй нечестивый Адриан жертву идолом  
принести, повеле ти, Евстафие, сим  
поклониться, мняше бо, яко тии тебе победу на  
враги дароваша; ты же отвещал еси ему, яко  
христианин еси и единому истинному Богу –  
Иисусу Христу верно покланяешися, выну  
воспевая Ему: Аллилуиа.

### **Икос 7**

---

Новое зло показа слугитель врага рода  
человеческаго Адриан, егда в безумнем гневе  
своем повеле тя с женою и чады твоими на  
растерзание зверем предати; обаче не возможно  
вреда вам сотворити: зверие бо лютии кротции  
соделашася, благодатию Божиею усмирями.

Сего ради, прославляя Господа, дивнаго во святых Своих, с любовью вопием ти:

Радуйся, исповеданием Бога истиннаго нечестивыя посрамивый.

Радуйся, прещения мучителя ни во чтоже вменивый.

Радуйся, идольскаго служения искоренителю.

Радуйся, христианскаго благочестия насадителю.

Радуйся, прелесть бесовскую обличивый.

Радуйся, подвиг мученический добре совершивый.

Радуйся, душу свою, во еже спасти ю, Христа ради погубивый.

Радуйся, во Царствии Небеснем наследие со святыми уллучивый.

Радуйся, великомучениче Евстафие, молитвенниче о душах наших.

### **Кондак 8**

---

Странно бе видети и слышати неверующим во Христа и неведущим силы Божия, како в немощнем человечестем телеси таковыя муки за Христа претерпевати возможно: был бо еси,

многострадальне Евстафие, по повелению нечестиваго игемона, ввержен с супружницею и чадами в раскаленного меднаго вола, в немже вы, муки тяжкия претерпевая, воспевали есте Богу: Аллилуиа.

## Икос 8

---

Весь радости божественныя исполнился еси, святой мучениче, и, любовью ко Христу Господу горя, на смерть за имя Христово мужественне потекл еси. Мы же, страдания твоя и присных твоих воспоминающе и велие терпение ваше похваляюще, глаголем:

Радуйтесь, истиннаго Бога проповедницы.

Радуйтесь, теплии к Богу молитвенницы.

Радуйтесь, верою крепкою Христу последовавшии.

Радуйтесь, смертию мученическою Христови спогребшиися.

Радуйтесь, в радость Господа своего вшедшии.

Радуйтесь, скорбьми многими живот вечный наследовавшии.

Радуйтесь, яко райския двери вам отверзошася.

Радуйтесь, яко в селениих праведных на веки водворишася.

Радуйся, великомучениче Евстафие, молитвенниче о душах наших.

### **Кондак 9**

---

Видевше вернии, яко телеса ваша, мученицы всехвальнии, невредимы во огни обретошася, восхвалиша Бога, прославляющаго святых Своя, и припадающе ко святым мощем вашим, песнь надгробную воспеша: Аллилуиа.

### **Икос 9**

---

Ветии многовещаннии не возмогут достойныя похвалы изрещи вам, святии мученицы, и познати силу Христову, еюже вы, яко бронейю облекошася. Мы же, похваляя подвиги страданий ваших, ихже за веру Христову мужественне претерпели есте, воспеваем вам таковая:

Радуйся, Евстафие, семейств благочестивых укрепление.

Радуйся, домашняя церкви утверждение.

Радуйся, Феопистие, жен и матерей похвало.

Радуйся, брака христианского диадимо.

Радуйся, Агапие, родителей добродетельных  
утешение.

Радуйся, целомудренного жития украшение.

Радуйся, Феописте, с присными твоими на  
пир Господень призванный.

Радуйся, с ними Царем славы венцем  
мученическим увенчанный.

Радуйся, великомучениче Евстафие,  
молитвенниче о душах наших.

### **Кондак 10**

---

Хотяй Господь Иисус Христос прославити вас,  
святии мученицы Евстафие, Феопистие, Агапие  
и Феописте, внуши святому Константину  
церковь на месте мученической кончины вашей  
создати, да вси притекающие к многоцелебным  
мощем вашим, помощь скорую от вас  
восприимут, вопиюще Богу: Аллилуиа.

### **Икос 10**

---

Стену заступления от всяких бед и напастей,  
обретше вас, всехвальнии мученицы, Отцу  
Небесному благодарение усердно возсылаем за

вся благодеяния Его, вами нам, недостойным, являемая; вам же, теплым молитвенником нашим, сичево приносим пение:

Радуйтеся, Церкви Христовы столпи непоколебимии.

Радуйтеся, любовью Христовою соединеннии.

Радуйтеся, Ангелов Божиих на небесех собеседницы.

Радуйтеся, призывающих вас на земли скории помощницы.

Радуйтеся, Царствия Христова надежнии нам ходатаи.

Радуйтеся, теплии о нас к Богу предстателие.

Радуйтеся, и по смерти вашей нас не оставляющии.

Радуйтеся, на пути спасения нас руководствующии.

Радуйся, великомучениче Евстафие, молитвенниче о душах наших.

### **Кондак 11**

---

Пение всеумиленное, ныне нами приносимое, примите, мученицы святии, вы бо, в жертву благоуханную Господеви себе принеши,

воспевали есте ему до последняго издыхания  
вашего песнь: Аллилуиа.

## **Икос 11**

---

Светозарныя звезды явились есте на небе  
церковнем, мученицы всехвальнии, среди коих  
и ты, Евстафие всехвальне, светло сияеши; сего  
ради прими от нас похвалы сия:

Радуйся, яко славу Трисияннаго Божества  
лицем к лицу зриши.

Радуйся, яко и нам светом Божественныя  
истины просветитися тщишися.

Радуйся, верныя на путь спасения  
направляяй.

Радуйся, грешныя на покаяние наставляяй.

Радуйся, яко мощами твоими чудеса  
источаеши.

Радуйся, яко в храмах, созданных на  
прославление имене твоего, незримо обитаеши.

Радуйся, странствующих невидимый  
спутниче.

Радуйся, всех призывающих тя скорый  
помощниче.

Радуйся, великомучениче Евстафие,  
молитвенниче о душах наших.

### **Кондак 12**

---

Благодать, данную ти от Бога, ведуще,  
страстотерпче Христов Евстафие, с  
благоговением и любовью покланяемся  
многоцелебным мощем твоим, от нихже в  
недузех исцеление и в скорбех утешение  
приемлем: темже и по достоянию прославляем  
тя, заступника нашего небеснаго, воспевая о  
тебе Господеви: Аллилуиа.

### **Икос 12**

---

Поюще многая и преславная чудеса твоя,  
великомучениче Евстафие, ублажаем тя купно с  
супружницею и чады твоими, яко заступников и  
молитвенников наших пред Богом, и молим тя:  
буди нам во всем ко благу помощник, усердно  
взывающим ти:

Радуйся, мучеников высокая похвало.

Радуйся, исповедников многопетая славо.

Радуйся, различныя болезни исцеляяй.

Радуйся, в недузех облегчение даруяй.

Радуйся, братолюбия наставниче.

Радуйся, покаяния проповедниче.

Радуйся, с небес на нас призираяй.

Радуйся, невидимо нам помогай.

Радуйся, великомучениче Евстафие,  
молитвенниче о душах наших.

### **Кондак 13**

---

О всехвальный великомучениче Христов Евстафие, прими от нас похвалы сия, с любовью тебе приносимья, и предстательством твоим у Престола Господа Вседержителя испроси нам от всех недуг душевных и телесных, от враг видимых и невидимых и мук вечных избавление, да купно с тобою в будущем веце воспоем Богу: Аллилуиа.

(Этот кондак читается трижды, затем икос 1 и кондак 1).



**ПОЛНЬІЙ  
АКАФИСТНИК  
КАНОНИЧЕСКІЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

І

НОВОЕ  
НЕБО